

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- मुख्यै च त्रै नमें अपराधिक कनून अज्जै थमां लागू।
- इस ब'रे दी अमरनाथें दी यात्रा च अजें तोड़ी 28 ज्हार कोला मते श्रद्धालु पवित्र गुफा च मत्था टेकी चुके दे न। 6 ज्हार कोला मते श्रद्धालुएं गी लेइयै नमां जत्था अज्ज जम्मू थमां घाटी लेई रवाना। उपराज्यपाल मनोज सिन्हा होरें श्रीनगर दे पंथा चौक आले ट्रांजिट कैप च श्रद्धालुएं लेई सुविधाएं सेवाएं दा जायजा लैता।
- जनरल उपेन्द्र द्विवेदी भारतीय सेना दे नमें अध्यक्ष, जम्मू कश्मीर राइफलज्ज थमां ओह पैहले सेनाध्यक्ष बने न।
- केन्द्री मंत्री डॉ. जितेन्द्र सिंह होरें आखेआ जे नोजवानें दी सोच ते नजरियै च बदलाव ते मकामी संसाधने वसीलें दा पूजा इस्तेमाल, जम्मू कश्मीर च स्टार्टअप्स दी कुंजी।

<><><><><><>

Criminal Laws

त्रै नमें अपराधिक कनून भारतीय न्याह संहिता 2023, भारतीय नागरिक सुरक्षा संहिता 2023 ते भारतीय साक्ष्य अधिनियम 2023 अज्जै थमां लागू होई गे न। इस कन्नै भारत दी न्याह प्रणाली च बड्डा बदलाव औग। एह त्रैवे कनून आईपीसी, सीपीसी ते भारतीय साक्ष्य कनून दी थाहर लैगन। नमें कनून आधुनिक न्याह सरिस्ता आंगन। एह नमें अपराधिक कनून जांच, सुनवाई ते अदालती प्रतिक्रिएं च तकनालोजी दे इस्तेमाल पर जोर पांदे न। उंदे तैहत शकैत ऑनलाइन दर्ज करना, गंभीर अपराधें दे मौका-ए-वारदात आली थाहर दी विडयोग्राफी करना शामिल ऐ। सरकार नै इस बारे च राज्यें ते केन्द्र शासत प्रदेशें कन्नै नियमित बैठकां कीतियां न ते होर नमें कनूनें गी लागू करने कन्नै सरबंधत तकनीकें, क्षमता निर्माण ते जागरूकता पैदा करने लेई पूरी चाल्ली तैआर न। नमें कनूनें बारे पुलस ते जांच सरबंधी अधिकारिएं गी सिखलाई बी दितती गई ऐ। आकाशवाणी ते दूरदर्शन दे समाचार बुलेटिनें, कार्यक्रमें ते परिचर्चाएं ते सोशल मीडिया दे मंचें राएं बी व्यापक बचार बमर्श ते गैहन विश्लेषण कीता गेआ ऐ।

<><><><><><>

Amarnath Yatra

श्री अमरनाथ जी दी पवित्र गुफा दे दर्शन लेई ऐतवारें 15 ज्हार श्रद्धालु आए। अजें तगर शिवें दे हिमलिंग रूपे दे तकरीबन 28 ज्हार श्रद्धालु दर्शन करी चुके दे न। ताई जम्मू दे भगवती नगर आले आधार शिविर थमां 6 ज्हार 461 श्रद्धालुएं दा इक होर जत्था बाबा बर्फानी दे दर्शनें लेई रचाना होआ। एह श्रद्धालु 265 गड्डिं दे काफले च सुआर होइयै अपनी अगड़ी यात्रा लेई रवाना होए। इंदे च 4 ज्हार 831 मर्द, 1 ज्हार 232 साधु ते 61 साध्विया शामिल हियां, कुल 6461 श्रद्धालुएं चा 2321 श्रद्धालु बालटाल लेई ते 4140 पहलगाम लेई रचाना होए। तोआई श्री माता वैष्णो देवी जी दे तीर्थ स्थान पर पुज्जारदे न। इस ब'रे अजें तगर यानि कल संजा 30 जून तगर 50 लक्ख थमां बद्ध श्रद्धालुएं श्री माता वैष्णो देवी जी दी पवित्र गुफा दे दर्शन करी चुके दे न।

<><><><><><>

Admin Amarnath Yatra

उपराज्यपाल मनोज सिन्हा होरें कल श्रीनगर दे पंथा चौक स्थित श्री अमरनाथ यात्रिं दे ट्रांजिट कैंप दा दौरा लाया ते उत्थें यात्रुएं दी सुविधा लेई कीते गेदे प्रबंधें दा मौके पर जायजा लैता। उनें श्रद्धालुएं ते सेवां प्रदान कराने आलें कन्नै गल्लबात कीती ते उंदे शा सुविधाएं दे बारे च पुच्छेआ पछाया। उपराज्यपाल होरें बक्ख-बक्ख कमरें ते सराएं दा बी चक्कर लाया ते सरबंधत अधिकारिं गी निर्देश दित्ता जे मुल्खै दे बक्ख-बक्ख हिस्सें थमां औने आले श्रद्धालुएं गी हर मुमकिन सुविधा उपलब्ध कराने च कोई कोर कसर नेई छोड़ी जा। तोआई जम्मू कश्मीर दे मुख् सचिव अटल डुल्लू होरें कल श्री अमरनाथें दी पवित्र गुफा दा दौरा कीता ते उत्थें उपलब्ध सेवाएं दा मुआयना कीता। उनें पवित्र गुफा दे ते नुनवन ते पहलगाम आले आधार कैंप च बनाए गेदे तत्कार रजिस्ट्रेशन कैंपें दा बी कम्मकाज दिक्खेआ। उने बी श्रद्धालुएं हर सुविधा दा ख्याल रखने दे निर्देश जारी कीते। ग्रामीण विकास मैहकमे दे सचिव शहिद इकबाल चौधरी होरें बी बालटाल च श्री अमरनाथ यात्रा लेई उपलब्ध सेवाएं सुविधाएं दा जायजा लैता। उनें श्रद्धालुएं लेई ठैहरने दी बवस्था, डाक्टरी सेवा, सुरक्षा ते साफ सफाई दे प्रबंधें दा निरीक्षण कीता ते सब्बने मैहकमें गी आपूं च नेडमा तालमेल बनाइयै कम्म करने लेई गलाया तां जे कुसै गी कोई दिक्कत परेशानी पेश नेई आवै ते यात्रा पूरी चाल्ली रमानदारी ते बवस्था आले ढंगै सिर तोड़ चढी सकै। ऐकती 29 जून गी शुरू होई दी री अमरनाथें दी एह यात्रा 19 अगस्त तोड़ी जारी रौहग।

<><><><><><>

DC Kathua Langer

कठुआ दे डिप्टी कमीशनर डॉ. राकेश मिन्हास होरें जम्मू-पठानकोट राष्ट्रीय जरनैली शिड़क पर छन्न रोड़ियां च 22मां बाबा बर्फानी सेवा मंडल मोगा पंजाब दे भंडारे दा उदघाटन कीता।

एह भंडारा श्री अमरनाथ यात्रा दरान लगने आले बड्डे भंडारें चा इक ऐं इस मौके पर बोलदे होई डिप्टी कमीशनर होरें आखेआ जे भंडारा संगठन आस्सेआ बिजन कुसै स्वार्थ दे कीती जा'रदी एह सेवा काबले तारीफ ऐ। एह लंगर 24 घेंटे कम्म करोग ते श्रद्धालुएं गी लंगर उपलब्ध करोआग। इत्थें कुसै बी आपात स्थिति दरान इक जहार यात्रिएं दे ठैहरने दी बी बवस्था ऐ। इस मौके पर बोलदे होई कटुआ दे डिप्टी कमीशनर डॉ. राकेश मिन्हास ते साबका एमसलसी सुभाष गुप्ता होरें आखेआ.....

<><><><><><>

Gujrat-NEET

गुजरात च केन्द्री जांच ब्यूरो सीबीआई नै नीट-यूजी दे मतेयान च कथित गड़बड़िएं दे आरोप च इक प्राइवेट स्कूल दे मालक गी हिरासतै च लेई लैता ऐ। इस स्कूल च बी 5 मई गी होए दे नीट दे मतेयानद 1 सेंटर बने दा हा। सीबीआई दी टीम इस आदमी दी रिमांड हासल करने लेई उसी अहमदाबाद च अदालत अगगे पेश करोग। इस गिरफ्तारी दे कन्नै गै इस मामले च अजें तोड़ी हिरासतै च लैते गेदे लोकें दी गिनतरी 6 होई गेई ऐ। एहूदे शा पैहले गुजरात पुलसै, मतेयान पास कराने लेई 27 विद्यार्थिएं कोला 10 लक्ख रपे दी मंग करने आले मामले च 5 जनें गी गिरफ्तार कीता हा। गुजरात सरकार आस्सेआ एह मामला सीबीआई गी सौंपे जाने दे बाद ब्यूरो दी टीम मामले दी तफतीश करा करदी ऐ ते अजें तोड़ी 4 आरोपिएं गी 2 जुलाई तोड़ी रिमांड हासल कीती ऐ।

<><><><><><>

Army Chief

जनरल उपेन्द्र द्विवेदी, जिंदे कश चीन ते पाकिस्तान कन्ने लगदे बन्ने पर कारवाइएं दा खरा तर्जुबा ऐ, होरें ऐसे समें च भारत दे 30में सेनाध्यक्ष दी जिम्मेदारी सांभी ऐ जिसलै असल कब्जा रेखा पर भारत गी केई चुनौतियां दरपेश न। जनरल द्विवेदी होरें एह जिम्मेदारी कोई चार दहाकें तोड़ी अपनियां सेवां देइयै रटैर होए दे जनरल मनोज पांडे हुंदे कोला सांभी ऐ। ओह जम्मू कश्मीर राइफल्ज जिसी आम भाषा च जैक राइफल्ज बी आखेआ जंदा ऐ ते लद्दाख स्काउटस दी बी सरपरस्ती करी चुके दे न।

एह जम्मू कश्मीर ते लद्दाख लेइ बड़ी मानै आली गल्ल ऐ की जे जनरल उपेन्द्र द्विवेदी जम्मू कश्मीर राइफलज थमां ओने आले पैहले सेनाध्यक्ष न। उंदा सेनाध्यक्ष बनाया जाना 16 ब'रे परानी उस परम्परा कोला बी हटियै ऐ जेहूदे च भारती फौज दी पूर्वी कमान दी अगुवाई करने दे तर्जुबे आले अधिकारी गी गै सेनाध्यक्ष बनाया जंदा रेहा।

<><><><><><><>

Startups-Dr. Jatinder Singh

विज्ञान ते टेकनालोजी दे स्वतंत्र प्रभार कन्नै केन्द्री राज्य मंत्री डॉ. जितेन्द्र सिंह होरें कल दऊं राज्य इक राष्ट्रीय सम्मेलन दे समापन समारोह दरान आखेआ जे नोजवानें दी सोच ते नजरियै च बदलाव ते मकामी संसाधने वसीलें दा पूरा इस्तेमाल जम्मू कश्मीर च स्टार्ट अप्स दी कुंजी ऐ। “जम्मू कश्मीर च अर्थबवस्था दे विकास च पढ़ाई राएं प्रेरत स्टार्टअप्स दी भूमका” विषय पर आयोजित इस सम्मेलन दा सरिस्ता एनआईटी श्रीनगर च कीता गेदा हा। डॉ. सिंह होरें आखेआ जे भारत च स्टार्ट अप मुहिम नै पिछले इक दहाके दरान बड़ी तेजी कन्नै रफ्तार फगड़ी ऐ ते एहदा सारा जस्स प्रधानमंत्री नरेन्द्र मोदी हुंदी पारखी नजर ते दूरै दी सोच गी जंदा ऐ जिनें “स्वतंत्रता दिवस” समारोह दरान लाल किले दे परकोटे थमां स्टार्टअप इंडिया ते स्टैंड अप इंडिया दा आह्वान कीता हा। डॉ. सिंह होरें आखेआ जे उसलै मुलखै च स्टार्टअप्स दी कुल गिनतरी मसां कोई साढ़े त्रै-चार सौ दे कोलकाल ही जेहूड़ी अज्ज डेढ लख कोला उप्पर पुज्जी गेदी ऐ ते स्टार्टअप्स दे लिहाज कन्नै भारत दुनिया च एल्लै त्रीए नंबर पर ऐ।

<><><><><><><>

Summary Revision

डोडा दे डिप्टी कमीशनर हरविंदर सिंह होर फोटू लग्गी दी मतदाता सूचिएं दी नजरसानी करने लेई तैआरिएं दा जायजा लैता। डिप्टी कमीशनर होरें बीएलओएं गी पूरी पराती जानकारी उपलब्ध करोआने दी महत्ता गी उजागर कीता। अफसरें गी आखेआ गेआ ऐ जे ओह घर-घर जाइयै सर्वे करन ते तस्दीक करन तां जे मतदाता सूचिएं दी विश्वसनियता जकीनी बनी सकै। उनें सहायक रिटर्निंग अफसरें गी हिदायत दित्ती जे ओह इलाके दे बीएलओ दी मजूदगी गी जकीनी बनान। उनें मुत्तलका अफसरें गी ताकीद कीती जे ओह उनें मतदान केन्द्रें गी परतियै नमें सिरेया सोआरन जिनें गी नुक्सान पुज्जा ऐ। कम्म समें सिर करने दे निर्देश दित्ते गे की जे तौले गै विधानसभा चुनां होने न।

<><><><><><><>

Reasi Capex Plan

रियासी दे जिला विकास आयुक्त विशेष महाजन होरें जिला कैपेक्स योजना 2024–25 बारे व्यापक बचार बमर्श कीता। बैठक दरान अजें तगर प्रस्तावित कम्में दी प्रगति ते उंदे आंकलन दा जायजा लैता। उनें बक्ख–बक्ख सेक्टरें तैहत प्रस्तावित कम्में, सिचाई, शिड़क ते इमारत बुनियादी ते माध्यमिक शिक्षा, युवा सेवाएं ते खेड्ड, शैहरी विकास, पीएचई ते होरने कम्में दा जायजा लैता। डिप्टी कमीशनर होरें मुत्तलका अफसरें गी हिदायत कीती जे ओह दो हफते दे अंदर अंदर योजना बनान ते उसी जमा बी करोआन।

<><><><><><><>

Health Awareness

भारतीय सेना दे, आम जनता ते मकामी लोकें कन्नै सदभाव आले सरबंध बनाई रखने दे महत्वपूर्ण मकसद तैहत पुंछ जिले दे पीर टोपा इलाके च फौज नै सेहत जागरूकता बारे इक लेक्चर दा सरिस्ता कीता जेहदे आले दुआले दे इलाकें दे 141 लोकें हिस्सा लैता। सेहत दे लिहाज कन्नै इक महत्वपूर्ण आयोजन च हिस्सा लैने आलें च 46 मर्द, 52 महिलां ते 43 बच्चे शामिल होए। इस जागरूकता कार्यक्रम दा मकसद लोकें गी नरोई सेहत ते तंदरुस्त जीवन दे महत्व ते एहदे लेई अपनाए जाने आले तौर तरीकें बारे जानकार बनाना हा। इस मौके फौज दे माहिर डाक्टर लोकें गी बक्ख–बक्ख आम बमारिएं दे बारे च जानकारी दित्ती ते कन्नै दस्सेआ जे किस चाल्ली इंदे शा बचेया जाई सकदा ऐ। लोकें गी सत्तदार खराक, खाने पीने दिएं आदतें, अपने शरीरै दी ते आले दोआले दी साफ सफाई दे महत्व गी उजागर करने दे कन्नो कन्नी इक खुशहाल ते नरोआ जीन जीने दे तरीके बारे बी जागरूक कीता गेआ।

<><><><><><><>